

Fakkeenya Nama Rabbiin ala wanta biraan waaqeffatuu-Kutaa 2

Description

Kutaa darbe irraa itti fufuun fakkeenya nama Rabbiin ala wanta biraan gabbaruu (waaqeffatu) haa ilaallu.

2-Nama dhama'aan wal fakkeessu

قُلْ أَنَّدَعُوا مِنْ دُونِ اللَّهِ مَا لَا يَنْفَعُنَا وَلَا يَضُرُّنَا وَنُرْدُ عَلَىٰ أَعْقَابِنَا
 بَعْدَ إِذْ هَدَنَا اللَّهُ كَالَّذِي أَسْتَهْوَتْهُ الشَّيْطَنُ فِي الْأَرْضِ حَيْرَانَ لَهُ
 أَصْحَابُ يَدْعُونَهُ إِلَى الْهُدَىٰ أَئْتِنَا قُلْ إِنَّ هُدَى اللَّهِ هُوَ الْهُدَىٰ
 وَأَمْرُنَا لِلنُّسُلِمِ لِرَبِّ الْعَالَمِينَ

۶۱

Jedhi, “Sila Rabbii gaditti wanta nu hin fayyannee fi hin miine kadhannaa? Erga Rabbiin nu qajeelche booda gara duubaatti deebinee akka nama [osoo] hiriyyoonni isaa ‘Nuttu koottu’ jechuun gara qajeelinnaatti isa waamanu, sheyxaanoni isa sossobanii dachii keessa dhama’ee [taanaa]? Jedhi, “Qajeelfamni Rabbii isumatu qajeelfama [sirriiti]. Gooftaa aalamaatiif akka harka kenninu ajajamne.” Suuratu Al-An’aam 6:71

As-Suddi ni jedha: Mushrikoonni Muslimoota gariin ni jedhan: Amanti Muhammad dhiisatii karaa keenya hordofaa. Rabbiin (azza wa jalla) aayah tana buuse: **Jedhi, “Sila Rabbii gaditti wanta nu hin fayyannee fi hin miine kadhannaa?”** Kana jechuun wanta yoo gabbarree nu hin fayyanne, yoo gabbaru dhiisnes nu hin miine gabbarraa? Kuni wanta Rabbii ol’aaan alatti gabbaramu hunda. Wanti Rabbiin alatti gabbaramu nama hin fayyadu, namas hin miidhu. Yoo gabbaran faayda irraa hin argatan. Yoo gabbaru dhiisanis nama hin miidhu.

“Erga Rabbiin nu qajeelche booda gara duubaatti deebinee akka nama [osoo] hiriyyoonni isaa ‘Nuttu koottu’ jechuun gara qajeelinnaatti isa waamanu, sheyxaanoni isa sossobanii dachii keessa dhama’ee [taanaa]?”

Kana jechuun erga Rabbiin gara Islaamatti nu qajeelche booda gara kufriitti deebi’uun akka nama sammuun isaa sheyxaanni isa sossobuun baddee ergasii dachii keessa raata’uu taanaa? Namni kuni hiriyyoota gamnootaa fi mu’mintoota ta’an qaba. Hiriyyoonni kunniin karaa qajeelaa fi sirrii irra jiranitti

isa waamu. Garuu inni ni dida.[\[1\]](#)

Aayah tana ilaachise ibn Kasiir ni jedha: Rabbiin ni jedha: iimaana keessanin booda yoo kafartan fakkeenyi keessan akka namticha namoota waliin karatti bahee Ergasii namtichi kuni karaa badeeti. Ergasii sheyxaanonni isa sossobuun dachii keessa isa dhamaasan. Hiriyoonni isaa karaa qajeelaa irra jiru. “Nuti karaa irra jirraa nutti koottu!” jechuun isa waamu. Namtichi kunis isaanitti dhufu dida. Kuni fakkeenya nama Muhamadin (SAW) erga beeke booda sheyxaana hordofuudha. Namoota karaatti kan waamu Muhammad (SAW) [fi Muslimoota isa hordafaniidha]. Karaan immoo Islaama.” Ibn Jariir dubbii kana gabaase.[\[2\]](#)

Fakkeenya ajaa’ibaa kana haala kanaanis ibsuun ni danda’ama: namni erga Islaama beekee fi qabate booda kufrii fi shirkiaa yoo deebi’e, sheyxaanni jinni fi namaa dubbii faayamaan isa sossobuun karaa qajeelaa irraa isa jallis. Erga karaa qajeelaa irraa jallate booda sheyxaanni dachii keessa isa dhamaasa. Karaa qabeenya barbaadu deema moo? Karaa aangoo barbaadu deema moo? Karaa qaama isaa ittiin gammachiisu deema moo? Yookiin wanta mushrikoonni kunniin gabbaran gabbara moo? Yookiin wanta Kiristaanoni waaqeffatan waaqeffataa moo? Karaa kamiin deemaa? Gara deemu wallaale dachii keessa dhama’a.

Fedhiin qullaan hundi gara karaa adda addaatti gara hundaan isa harkisti. Karaaleen kunniin karaa Rabbii qajeelaa ta’e kan faallessaniidha.

Sheyxaanni isa jallisun dura karaa Rabbii qajeelaa ta’e keessatti hiriyyoota Muslimoota ta’an qabaa ture. Muslimoonni kunniin gara karaa qajeelatti isa waamunakkana jedhuun: “Gara keenya koottu. Karaalee jallinnaa dhiisi. Waamicha sheyxaanotaatii fi dubbii faayameen hin gowwoomin.”[\[3\]](#)


Mee wanta sheykh Abdurahmaan Sa’dii jedhe itti haa daballu: Erga Rabbiin nu qajeelche booda gara jallinnaatti, karaa Jannata qananiitti nama geessu irraa gara karaa adabbii laalessaatti nama geessutti deebinaa? Namni sammuu qabu haala kana hin filatu. Namni haala kana filate akka nama sheyxaanni karaa gahuumsa isaa ittiin gahu irraa jallisee fi raatesseeti. Ergasii dhama’aa ta’ee hafe. Hiriyoonni isaa gara qajeelinnaatti isa waamu. Sheyxaanni immoo gara jallinnaatti isa waama. Ergasii inni waamtota lama jidduutti dhama’aa ta’ee hafe.

Nama Rabbiin tiikse malee kuni haala namoota hundaati. Isaan of keessatti waamichaa fi harkisa wal faallessan argatu. Tokko waamicha ergaa Rabbiin irraa dhufee, sammuu sirrii ta’ee fi uumama qajeelaa ta’eeti. Gara qajeelinnaa fi Jannata keessatti gara sadarkaa ol’aanutti isa waamu.

Lammafaan waamicha sheyxaanaa, nama karaa isaa hordofee fi nafsee wanta badaatti nama ajajjuuti. Kunniin immoo gara jallinnaa, Jahannam keessatti gara sadarkaa hunda caalaa gadi aanutti waamu.

Namoota keessaa nama dhimma isaa guutuu ykn irra caalaa keessatti waamicha qajeelinnaa walin ta’utu jira. Ammas isaan keessaa faallaa kanaa kan ta’etu jira.

Ammas isaan keessaa nama waamichi lamaan isa biratti wal qixxa’antu jira. Humni harkisaa lamaan isa biratti wal lolu. Bakka kanatti warra gammachuu warra dararaa irraa adda baafte beekta.[\[4\]](#)



Ergaa Rabbiin irraa dhufe
(Qur'aana), Nabii Muhammad
(SAW), mu'mintoota, sammuu
sirrii fi uumama qulqulluu: gara
karaa qajeelaa, Jannata keessatti gara
sadarkaa ol'aanu, amaloota gaggaarii fi
gammachuutti waamu

Nama dhama'aa. Yoo gara waamicha Qur'aanaa,
Nabii Muhammad (SAW) fi mu'mintootaatiif deebii
deebisee isaan hordofe, gara sadarkaa oliitti ol baha,
galma guddaa gaha. Yoo kana didee sheyxaana fi
namoota isa hordafaniif deebii deebise, dhama'aa ta'e
hafa. Dhumarratti gara sadarka gadi aanatti gadi bu'a,
Jahannamitti kufa.

Sheyxaana, mushrikoota,
kaafirota, nama badii hojjatanii fi
nafsee waan badaatti nama ajajju:
gara jallinnaa, ibidda Jahannam,
sadarkaa gadi aanaa, shirkii, amaloota
fokkuu fi dararaatti waamu.

Namni Islaama irraa duubatti deebi'ee shirkii fi kufrii keessatti kufe akkanuma. Jirenya keessatti ni
dhama'a. Gara deemu hin beeku. Galma isaa hin gahu. Rabbii olta'aa irraa nagaha kadhanna. Inni
kanarraa nagaha nu haa godhu.

“Jedhi, “Qajeelfamni Rabbii isumatu qajeelfama [sirriiti].” Kana jechuun qajeelfamni karaa Rabbiin
arraba Ergamaa Isaa irratti baase qofaadha. Wanti karaa kanaan ala jiru jallinnaa fi badiinsa.[\[5\]](#) Karaan
Rabbitiin nuuf ibsee fi akka qabannu itti nu ajaje, amantiin Inni karaa nuuf godhee fi nuuf ibse, qajeelinna
shakkiin keessa hin jirreedha. [Karaan qajeelaan] awsaanaa fi sanamoota nama hin fayyannee fi hin
miine gabbaruu miti. Kanaafu, haqa dhiisne soba hin hordofnu. (Awsaana-wantoota Rabbii olta'aan
alatti waaqeffataman.)

“Gooftaa aalamaatiif akka harka kenniu ajajamne.” Kana jechuun Rabbiin Gooftaan keenyaa fi
Gooftaa wanta hundaa ta'e Isaaf akka harka kennuun, ajajamuu fi ibaadaan Isaaf gadi jennu nu ajaje.
Ergasi kana hunda akka Isa qofaaf qulqulleessinu, [nu ajaje].[\[6\]](#) Aalama jechuun namoota, malaykoota,
jinnoota fi uumamtoota hunda.

Guduunfaa

?Namoonni Rabbii olta'aan alatti wanta bira a waqeffatan gara wanta waqeffataniitti halkanii guyyaa namoota waamu. Karaa qajeelaa irraa nama jallisuuuf dhagaan isaan hin garagalchine hin jiru.

?Yeroo kanatti, namni Islaama qabateakkana jechuun isaanitti deebisa: **Sila Rabbii olta'aan alatti wanta nu hin fayyannee fi hin miine gabbarraa (waaqeffanna)? Sila erga Rabbiin karaa qajeelatti nu qajeelche booda jallachuun akka nama sheyxanni dachii keessa raatesse taanaa?**

?Namni Islaama dhiise akka nama sheyxanni dachii keessatti dhamaase ta'a. Gara itti deemu hin beeku. Sababni isaas, Islaamni karaa qajeelaa Rabbiin gabrootaaf kaa'e waan ta'eef gara itti deemanii fi akkamitti akka deeman namaaf ibsa. **“Jedhi, “Qajeelfamni Rabbii isumatu qajeelfama [sirriiti].”**

?Islaamanala amantiwwan jiran immoo jallinnaa fi dukkana waan ta'aniif gahuumsaa fi akkamitti jirenya keessa akka deeman namaaf hin ibsan. Namni ifa keessaa bahee dukkana keessa yoo seene haalli isaa akkam ta'aa?

Kitaabban wabii:

- [1] Tafsiir Muyassar-136
- [2] Tafsiir Ibn Kasiir-3/557
- [3] Ma'aariju Tafakkuri-11/291-292
- [4] Tafsiir Sa'dii-291
- [5] Madda olii
- [6] Tafsiir Xabarii-9/333

Date Created

July 6, 2020

Author

admin